

師竹齋集

詩之爲義風雅頌而已矣雅頌作於廟堂而風遍於十
五國故子夏序詩用之鄉人用之邦國其言風者獨詳
夫風者氣也莊周之言風曰大塊噫氣萬竅怒號又宋
玉之賦風曰侵淫谿谷梢殺林莽夫風豈有異哉行乎
自然發於其所不容已故刁騷蓬勃隨所觸而形之聲
之工與弗工亦非所計若是吾於李君和叔之詩見之
和叔家綿州偕弟鳬塘皆以俊偉鴻博之才入詞館旣
改爲中書舍人蓋身在承明著作之庭宜以雅頌爲職
志者然家本寒素雖通籍猶不免爲負米之行由齊魯
入吳越楚奔走輒數千里又往還蜀道足跡幾遍天下

耳目所見與山水所歷結轡而不能平往往於詩發之
君之詩自曹劉以逮高岑下至韓蘇無不仿亦無所不
似而得之少陵者最多其意激昂而慷慨其格突兀而
清蒼其辭軒豁而呈露彫鏤刻琢不傷於巧凡人所欲
言而未能言者標舉出之適如平人之所欲言有解頤
者有擊節者大旨歸於君親夫婦倫紀之常天時人事
政治之大故於少陵詩不求工而自工非如明季詩人
剽竊而比擬之也予交巴蜀士大夫衆矣唯丹稜彭先
生輩洙有文章道義之契其弟遵泗能古文皆夙所景
慕竊今二彭卽世久矣而君兄弟復以詩雄視於京師

蓋非獨繫巴蜀之風凡采風於列國者皆將因詩而驗
其政之美惡俗之良桡有功於詩義豈淺鮮哉嘉慶己
未三月青浦王昶書時年七十有六

蜀山水爲天下奇絕處我岷之高錦江之麗瞿唐巫峽
之嶮急劒閣棧道之斗峻而紆峭震心駭魄莫可名狀
九州之奧區無逾於此力如五丁不能繼其幽窅如杜
宇清如吟猿不能鳴其悲怨吐其鬱積故必鍾於人文
以發之昔者漢有長卿淵雲唐有太白宋有三蘇氏剪
華振萼澎湃恣肆與蜀地山川相爲雄長明代用修富
擅才藻亦堪驟斬我朝百數十年來秀傑之士殆不
乏人而胸中奇崛之氣鏗訇激盪一發其山水之奇足
以追躡前賢者吾得之於同年李君和叔和叔與余同
入詞林旣乃先後改官締交二十餘年矣向但知其能

詩猶以尋常詩人視之也迨今歲初秋余因病請假得
取師竹齋集而徧讀之然後知和叔之爲詩本性情哀
樂之真合風雅正變之義自少陵香山以及坡公皆所
師法而自成杼軸其壯者驅策風雲其細者雕鏤冰雪
嗚呼是豈漫矜詩豪者哉吾聞蜀中丹稜三彭者文章
有聲而張船山太史詩名噪於都下三彭已往吾不獲
與之接矣船山識之而愛其詩然未讀全詩知船山不
如知和叔之深也蜀故多才意必尙有未之識而未之
知者乎吾將就和叔問之嘉慶四年己未仲冬年愚弟
元和馮培拜序

蜀之山川雄奇瑰偉甲于寰宇峨嵋岷江之勝綿亘縈
迴數千百里是固宜有豪傑非常之士出焉而萃其能
于一家之中則尤爲古今之盛事自晉杜氏軫烈兄弟
同稱于世至宋蘇氏軾轍魏氏了翁文翁張氏栻杓以
及李氏性傳道傳心傳皆能以文章事業顯而李氏尤
盛至于我朝蓋多以材傑著者余所識如王氏汝璧
汝嘉張氏問安問陶兄弟皆以詩著而和叔前輩與其
兄雨村弟鳧塘前後入翰林並有詩名然則李氏之盛
信不獨于古爲然耶雨村詩久刊行鳧塘集余亦近爲
勘定獨和叔詩未獲睹其全茲從海外歸以師竹齋集

俾余讐校遂卒業焉而後歎其才爲不可及也夫人之才至不一矣而唯能敦其性情于父母兄弟朋友之間者其才爲真才而著之于辭始足以使人反復之不厭以觀和叔其于父母兄弟朋友之間可謂深于情者矣歌泣欣戚皆發于不容已而非有所勉強故其詩直抒胸臆豪肆橫出舉人所不能達者悉有以達之至于模山範水特其辭之寄也以其辭之寄而知其情之深然則讀和叔之詩者詎可悅其辭而不察其用意之所在也哉或曰和叔海上詩一變而爲壯麗之音殆其境有以發之耶不知情旣深矣其才自壯和叔卽不過海其

壯麗自在或又曰和叔少年以太白自命每下筆輒作
太白想吾謂古人不可以形迹求也太白不自知其爲
太白所以能成其爲太白斤斤然執一太白而慕倣之
曾不知太白性情之所在則世之慕太白而襲取其辭
焉者其人皆太白也耶嘉慶七年壬戌孟春館後學栢
山法式善拜序

師竹齋集卷一

蜀綿李鼎元墨莊氏撰

甲申至庚寅

古今體詩九十三首

甲申偕龍山二兄讀書環翠軒每薄暮共持樂天
詩暗誦十首約過目卽掩卷取燈錄之率爲常
課一日大人偶見笑以爲癡承命口占

過目相期誦不遺朝朝爭勝夕陽時誰憐一卷開旋閉
父笑雙雛黠也癡且共挑燈徐對簿仍留剩墨待吟詩
詩成忽見月輪上偷向西牆畫竹枝

晚釣

每逢下塾暫開顏
偷到前溪釣柳灣
意不在魚偏愛水
心原似鶴況依山
笛聲遠近牛初下
樹色蒙籠鳥漸還
坐話漁樵忘上餌
浮生又得片時閒

晚行溪上

清溪如帶繞龍門
晚步溪頭腹自捫
幾片明霞紅到水
一鉤涼月淡無魂
偶逢釣叟知魚樂
忽見虞人學馬奔
莫漫好遊兼好獵
離騷未熟且重溫

龍山登高

攜酒上高山
山荆乍可班
秋風吹客帽
遠夢落松關
樵子擔雲出
烏犍載月還
醉從牛背卧
未覺牧童頑

晚興

月破竹梢烟階除疊玉錢蟲聲依戶冷燈火向人煎心
靜書多味霜清菊正妍忽聞賓雁過秋士感華年

水輶

閘水如瓴建衝流對考槃隻輪依笕石盡日走彈丸機
栝天旋妙磐基地道安空憐牛磨苦陳迹踏團團

鸚鵡

橡栗及秋熟山山鸚鵡喧只緣來路遠不厭好音煩寄
食珊瑚架祝人松竹軒鳳皇翔萬仞正不在能言

乙酉

和石亭伯父山房卽事四首

小園親炙趣閒身
掛却衣間一斗塵
有月有花兼有酒
武陵真合醉漁人

掃得閒愁卽是仙
春隨花鳥醉林泉
偶來池上觀魚躍
蹙破波心卵色天

有時望遠上層臺
暢好雲山四面開
霧散曉溪牛渡去
烟籠晚樹鶴歸來

梨花如雪柳如絲
正是蜂狂蝶亂時
席上每留將盡酒
階前常剩著殘棋

池上賦水面楊花

生憎柳絮太顛狂，桃李門前弄晚香。
飛雪鋪瓊纔徑路，浮家泛宅又瀟湘。
魚兒噉光無定符，帶牽連勢轉長。
要與青萍爭月色，橫拖白練覆池塘。

羅江東門大橋歌步石亭伯父韻

長虹百丈駕飛閣，東來紫氣滿城郭。
犀遊高岸波初平，龍鎖深潭潛不躍。
憶昔羅江多巨濤，渡船日折千張篙。
夏雨漲排雲樹下，秋風浪湧雪山高。
不特崖崩城角壤，行人往往葬澎湃。
白馬關寒鬼暗啼，金鴈橋空石成怪。
宰官十輩豈無良，坐愁功大但彷徨。
汲井幾回慚綆短，望洋終歲嘆川長。
滇南楊君爲羅作，勸民買牛銷劒鋸。

服教畏神令易行計畝均輸空旋鑿伐石西山輦萬夫
築城四面金湯如餘力造橋成不日落以天河衆墨豬
落成日禮賽陽侯散陰鬼佛說陰功大如此鯨鯢徙宅
神虬飛鼉鼉抱柱老蛟死從信羅江水似羅百年安穩
平不頗行人新過樂如何嗚呼行人新過樂如何

漫興

景要逢時不在香色能殊衆便流芳楊花慣作三春雪
楓葉偏宜九月霜人世自多歡戚累天工未覺剪裁忙
等閒莫怨秋冬冷梅自殷紅菊自黃

送柴豹文先生公車北上

十年隨絳帳此日餞征鞍
梅柳風初暖關山雪正寒
殷勤將別淚珍重勸加餐
杏發燕臺日書來慰所歡

丙戌

成都贈友

本乏穿楊技空憐鮑叔知
交親榮辱外情重別離時
對食哀韓信逢人說項斯
一樽堅後約腸斷隔年期

我愛南村好十首

我愛南村好臨溪復背山
竹簫鳴地籟松蓋聳雲鬟
清曉牛爭出黃昏鴨自還
有田皆活水稼穡不知艱

我愛南村好人烟數十家
孝慈封比戶耕讀過生涯
好

客多雞黍尋春足酒茶最憐阡陌路處處有梅花

我愛南村好梨花二月香家家鳴社鼓處處賽文昌人
醉垂楊岸牛眠門草場農功初有事春水一犁黃

我愛南村好郊原三月時柔桑筐女問短笛牧童吹最
好清明雨無邊綠意滋秧針齊刺水忙煞老農師

我愛南村好茅簷修竹中瀟瀟晴帶雨習習靜疑風當
暑鳴春鳥無冰語夏蟲儂心原不熱况復住深叢

我愛南村好秋來稼似雲倉多來歲米戶少隔朝輩

蜀人

呼肉爲輩菜

寡婦肩遺穗貧兒醉早醺鄉風真太古他邑未

曾聞

我愛南村好前溪雨漲餘蘆邊千罩獵柳外一罾漁敬
老開家晏烹鮮剪夜蔬香秫新薦寢歡笑動茅廬
我愛南村好深秋草不黃菊分霜蟹味桂剪月輪香報
德惟田祖登高有醉鄉振衣千仞上同輩幾人狂
我愛南村好初冬煖氣回爲牛尋舊社祭虎漉新醅淺
綠田間麥深黃嶺上梅蜀中原少雪十月尙聞雷
我愛南村好尤憐饋歲時庖丁先執豕老婦自煎飴閒
月惟今夕淳風到古羲終年耽樂事村外少人知

丁亥

成都紀事

櫓材也許濫儒巾九試方慚第一人自是庸中容佼佼
敢從稷下說彬彬風迴玉壘花初放雲起江城錦乍新
故物青氈真見慣眼前且喜慰雙親

答友人問試武童騎射事

翁歸文武未須嘲一笑何妨學射雕踪跡偶同秦范叔
襟懷原許漢班超戰場匹馬幾無敵試席孤羆敢自驕
箭欲疊雙雙不得空教大戟氣沈銷

紋江書院呈邑師楊古華先生

不是爲賢侯胡爲負笈遊春風當席坐江月對窗流業
類工居肆情同鳥出幽可能開道路謬許是驂騑

洛城懷古

張任墳雖在難尋金鴈橋陰謀誠小就王業未全消宮
冷青羊瘦關塞白馬驕當年埋鳳處空嘆羽脩脩

卽目

縣小當衝道寧辭驛馬疲羽書惟北上星使半西馳水
暖雲生易山高月上遲淡烟喬木意只有劒南知

讀書

偶得書中趣他人恐未知春風花暖候秋雨夜寒時細
酌三杯酒狂吟五字詩倦來何所事良友一枰碁

和古華先生文房四詠

紙

薄到無情處先生用始奇萬年存古籍一卷得新詩色
與霜爭滑光憐玉有脂試從秦後問青史不慚誰

筆

一自管城封人人重此公獲麟知聖厄倚馬見文雄曲
直何須辨剛柔在得中最憐班定遠半世爲伊窮

墨

汙白世同憎惟君擅美名於人羞作吏在客亦稱卿小
助蛾眉媚頻分鴈塔榮相磨經十載底事愧濃情

硯

石友相隨久其貞我不如眼明雙翠鴿鱗集半池魚

中硯

物凹處多藏墨閒來輒就書問渠穿得否結習正難除

戊子

秋闈報罷

遠山如畫晚秋天獨自騎驢蹋錦川頗愧囊無長吉句
空憐賦獻陸機年稻田穫後苗仍茁楓樹凋餘葉尙然
最是僕童愁不解羨人先著祖生鞭

不得龍山北闕消息却寄

林鴉歸陣亂斜陽捲卷長懷舊雁行無酒不同花下飲
有詩常共枕邊商關山路遠空望月松菊心寒又見霜

若到蟾宮應念我幾時聽雨再聯床

田家雜興

余家起稼穡田事識甘苦不力期逢年如種未播土夏
苗秀無根根莠族其伍一歲已滋蔓再歲尤跋扈翁如
懶不治場圃莫爲主翁卽憤欲治根株那盡取縱賊在
一日貽害到千古乃知農可師慎哉毋莽努

上農深耕田地暖根亦暖下農淺耕田人嬾苗更嬾欲
識農勤惰但課禾深淺深者穗一尺淺者三寸罕穗長
穀一升穗短穀一盃同爲百畝主地道寧偏袒我倉何
以歉彼倉何以滿請農終夜思來日應自勉

田家有貧富田力有厚薄非關糞不齊亦非力不足拙者歲一收巧者貪三穫嗟哉地力竭歲漸不人若如人病初起何堪再勞削如馬歇未定何堪再騰躍安貧拙有餘速富巧不足乃知貪巧苦未若安拙樂

三春蠶事起貧女忙采桑富女不知愁買桑作蠶糧物力昧艱難但恐蠶飢傷豈知蠶過飽未老色先黃起看貧女蠶作繭大于盎問何獨能爾答云無奇方飼之有常時采之有常筐我聞三嘆息萬事成有常

醒園雜詩八首

并引

余自戊子新春邀蔡製亭茂才就醒園讀書與

至輒有吟詠時方事舉子業不甚收拾落第後
於亂紙中拾得舊稿因改存八首以皆作於醒
園目曰醒園雜詩云

未日客先起萬緣清到心鶯歌花徑滑蛙鼓稻田沈
淡雲生岫昂昂鶴在陰飛騰如有意爲爾一揮琴
落日淡山影松杉千丈長林鴉喧不定簷雀噪還藏
細剪蘭心燭微聞菜甲香飽餘無個事待月步東廊
清明墳墓近盡室入家祠見我翻如客當仁肯讓師
紙灰蝴蝶夢心事鵲鵲詩痛哭泉臺下千塋剩一支
山缺月輪上一窗花影疎看花神入畫愛月手攤書
火

不因蛾滅心仍似竹虛達摩曾面壁知我意何如
夕陽下翠微緩步出柴扉水黑魚爭躍山青鳥自歸樵
歌得詩趣牧笛有禪機閉戶無多日楊花已亂飛
朝省南村去歸來日半竿愁多書未熟身健路何難望
嶺雲猶合尋花露未乾升堂良友問爲報竹平安
暑氣避山林南風吹我襟松濤常作雨澗水自鳴琴本
不因人熱惟堪抱膝吟夏畦多病者何以慰農心
獨立最高處目窮千里秋山連巴子國江接越王樓逝
日眞如水當年早放舟會須附鵬翮南溟續前遊

巳丑

聞石亭伯父凶問

北雁傳凶信狂風折梁木推書自百踊失聲唯一哭憶
我八歲時遠就姚江讀維伯實愛我謂我秀而樸飲食
教誨之至情勝鞠育兒癡不忍嗔兒愚不忍扑中遭祖
父憂但恐兒廢學擇師遍浙右自越延至蜀兒年日以
長伯恩日以篤別來近三年書常月一束望兒捷秋闈
相期聚涿鹿痛哉願未諧棄兒亦何速人生難上壽中
壽固易卜天胡奪伯早花甲未週六謂信或失眞惡夢
偶然觸紙上雨村血曷爲在我握哀哉理不齊痛矣身
難贖如伯循良聲竟未享大祿如伯忠恕心竟不蒙厚

福況兒本癡愚成復有誰玉便擬燒筆硯守墓逐樵牧
紋江書院感懷

城南空憶友如雲痛哭吾宗築室人當戶碑移成驛傳
升堂客散有鴻賓青山無恙惟招隱碧草埋愁不再春
惆悵夕陽腸欲斷百年身事摠埃塵

醒園遣懷

蕭蕭萬木撼柴扉無限風聲怨落暉豈料陰成人易逝
尙憐路遠樞難歸將書北鴈雲生棧正訴東皇月到幃
觸處愁心無可遣花前惟有涕霑衣

醒園十詠

大觀臺

松栢園三面臺東俯萬山江橫象鼻嶺雲鎖鹿頭關竹
影當風爭花光坐月閒大觀何得似福地有琅環

看雲樓

樓踞山之頂雲生戶牖傍直疑人坐蜃獨泛海中航遠
岫窗前綠香秫雨外黃最宜秋晚眺百里樹蒼蒼

臨江閣

清絕臨江閣晨昏偶一窺巖寒飛蝙蝠沙暖曬鷗鷺畫
意雲常活琴心水自知知音難再得掩面哭鍾期

巢雲室

蝸廬當谷口雲入不思飛石罅流香乳松厓閉落暉巢
由眞許臥若客未須譏築室人何在歸田願已違

笛車

架木高千尺淩空轉轆轤
笛排枯筭出水作建瓴趨在
渚聞宵鴈行天速晝鳥良田
沾百畝臥理可忘劬

天然床

根到九泉香蛇蟠十丈強大材
歸匠石餘事得匡床客
至談碁隱仙來話醉鄉天然
高臥可愼勿夢黃梁

坐花館

客與花同坐花清客亦清
直疑春有恨未覺日無情
擬

師竹齋集

卷一

七

化枝閒蝶兼聽柳外鶯一杯還對舞來趁月三更

木香亭

一架醖醖馥幽然得此亭窺人多小鳥照字有流螢徑
擁松毛赤階連石髮青坐來忘酷暑漏日見星星

聽濤閣

小閣坐山腰濤聲不待招驟聞三伏雨高枕一江湖鶴
鶴心常警風雲氣倍驕有材人自識何用日囂囂

洗硯池

磨墨人何在空餘洗墨池片雲潭底黑碎石雨中緇舞
鏡應無雉支床尚有龜故書猶在壁讀罷淚雙垂

自成都趨至綿州迎石亭伯父柩二首

二百里程窮日歸人生難得是親知情當專至能無倦
心到傷深自不飢一慟真教成血淚此身何處報恩私
朔風烈烈霜威緊併入靈幃助我悲

哭罷靈幃唁弟兄荒村月上近三更談心畧問風塵色
握手微聞哽咽聲萬里關山惟欠死百年哀怨是戕生
因言動我無窮感廉吏難爲楚相輕

庚寅

清明雨霽同雨村龍山作

傷心何處最關情碧草如烟雨乍晴正是清明腸欲斷

杜鵑聲裏哭萋宏

掃墓

嘉樹葱葱列佳城鬱鬱重風聲來谷虎山勢走雲龍
籩豆烝嘗潔兒孫拜掃恭本源看木水修省幸無慵

病項

生平顧盼詡風流今日如何引項愁一笑聊同望夫石
任人千喚不回頭

和雨村醞園獨坐二首

人心不空洞每爲世事羈豈知事前定廢寢亦徒思
請看嶺上木寧與棟梁期偶中匠石選彫繪雜虬螭又如

藍田玉不受蒼蠅繯久埋汙泥中希白仍恐遲用舍非
我爲土階傲丹墀生死蟬蛻耳逍遙鵬安之偏慚客不
文兼求歌類詩區區筆墨間爭勝亦何奇願爲溝中斷
不材甘自知願爲石中玉不器少人移但愁豐城劒顯
晦尙有時束身須愛鼎作事戒折枝吾祖有遺訓無爲
無不爲

讀書何必多致身何必早先開必先謝既往迹如掃天
地豈不仁功成難再造貞柏生易孤長江流不倒每笑
愚妄兒遇事輒求禱百年能幾時神仙不自保况茲蒲
柳質乾坤一小草動云壽金石茫然增煩惱萬物有本

性水濕火就燥鳧頸與鶴脰長短各自好卽如我弟兄
會豈期素縞梁木忽以萎善人復誰寶心苦我輩知外
人那堪道嗟嗟夫何言物壯則已老

綉毬秋榮和雨村韻

玉爲花骨粉爲團記得殘春帶月看忽報秋園開滿樹
好同仙桂鬥奇觀翩翩隊蝶枝頭活落落繁星嶺外乾
舉子正忙槐正藥一杯相賀酒闌珊

祝芷堂鄧筆山座主枉駕醒園同用杜子美遊何
將軍山林韻十首

嶺樹填雲谷盆花架石橋幾人垂白眼有客下青霄在

藻魚知樂穿林鳥暗招光輝流草木未覺使星遙
憶昨草堂寺傳來詩派清郵筒疲驛馬求友出鳴鶯南
海鱸魚膾東坡玉糝羹合併叨侍席花下酒三行
頗愧詩初學樽前強自支談龍循地脈射鮒測天池詎
敢論三絕時還貢一知昌黎文自好星斗爛紛披
旣覺詩無敵還疑筆有花壇中排鶴鶴壁上走龍蛇落
落松風遠醺醺菊味賒鄉人爭問客錯認是仙家
入夜遊人散挑燈晏更開通家慚孔李座主實歐梅月
影杯中落江聲枕上來興高偏不寐門健踏蒼苔

笑語林間出秋風咽澗泉園丁供列炬奴子伺添薪白

露聲銅箭明星疊玉錢最憐奎聚處紫氣動前川
品隲到秋桂心期春杏香與雲商出處就日辨爰京董
策知難射庖力不易藏毛雖須努力莫待鬢毛蒼
南村敝廬近阡陌半陂池使者移旌節鄰翁倒接羅蓬
頭王霸子凡鳥謝家兒底事勞鴻獎長令筆墨隨
可奈王程速遙瞻劔閣雲阮亭留後記杜老續前文陟
險知神王名山有夢分蹇驢追不及維繫亦徒紛
便欲料行李其如赤手何懷人天末遠獻賦日邊多空
切庚呼諾難忘子夜歌醒圓回首處長憶客星過

發南村

憶余八歲日隨父買南舟詎有四方志別母不解愁歸
來近十年溫清近始謀兒長親漸老所戒惟遠遊何圖
竊一第喜內藏隱憂蹉跎到殘冬逼迫上傳郵有姊已
適人有弟賦好述家貧百事難此別寧不愁鄰里趨來
送樽俎列道周對酒不下咽熱淚杯中流回頭語妻子
克孝仗汝籌要先承志意菽水勝珍脩離思寄何處落
日西山陬去去復何言親命不自由

金山驛

此是當年磊落州客來還問越王樓山分劔北雲猶族
江破城東水橫流舊日埋金沙岸出新鄉割地邑人愁

新移州治於羅江割
城東八里入梓潼
就中自大官惟判也向民間說故
侯

七曲山

曲路蟠蛇逐水隈山頭有廟上崔嵬名高北斗文昌近
地鎮西川劒閣來一髮潼江神禹鑿千幢古柏漢時栽
入祠不敢私求禱爲帝聰明列上台

武連坡

山勢欲入棧峯巒峻不已舉手捫青天一坡十五里陡
絕馬蹄滑進尺退輒咫尺行人舍騎徒倦或附其尾怪石
蹲虎豹老樹立山鬼風霜助其威觸雲怒欲起地抹無

階梯一墜轉丸似呼朋各慎步世路險如此

劔閣

八百里雲飛青天接地維易成司馬計難出武侯師關
塞重重閉林巒步步奇可憐行不得惟有杜鵑知

記夢

記夢豈必夢憑心自撰造寫心不問心一任筆所到赤
鯉夜傳書邀我遊員嶠海水迷天光雲陰蔽日曜中有
安期生髮白顏猶少啗我棗如瓜授我丹成竈嬰兒與
姪女夾侍清且妙移時輒千語將問驚一覺醒來身在
山但聞子規叫微餘鼻觀內時有香生竅

漢中

山南望山北俯見漢中城一水分秦蜀重關壓楚荆風
雲餘王氣秔稻動鄉情自別潼江後今朝夢不驚

鳳嶺

鳳嶺迢迢欲出山蜀人馬上認秦關西岐瑞鳥留丹穴
南國騶虞化百巒尙有驚魂來夢裏早無鄉語到田間
逢人莫話連雲棧聽客愁他損玉顏

秦中

厯盡奇山到雍州鳳凰聲出杜鵑收中原霸業歸前漢
上古王風屬武周天險難依星北拱地靈有恨水東流

潼關四扇堂堂在爲說興亡欲白頭

鴻門懷古

鴻溝未割有鴻門楚漢興亡在酒尊就裏機謀誰識得
一雙白璧換乾坤

驪山

松柏驪山好開元事已非有泉名太子無地葬楊妃雪
淨林陰瘦霜清麥壟肥遊人新浴罷溫氣入春衣

臨潼除夕

餽歲何堪憶公車指北燕應憐人在客難得酒如泉風
俗周文武山川漢陌阡衛鞅空負謗遺法二千年

師竹齋集卷二

蜀綿李鼎元墨莊氏撰

辛卯至丙申

古今體詩六十九首

渭城元日

客路無元日居人賀歲忙
春寒非故國酒薄是他鄉
渭水冰猶結華山雪未燭
蜀中無此景回首意茫茫

望華

雍豫難分處華山近若何
地鍾金氣盛天削玉峯多
樹色餘前代雲陰塞大河
馬蹄留不得有夢到厓阿

汾陽王祠

第一善居功無如郭令公朝廷稱尙父迴紇拜而翁甘
載安危繫千秋俎豆崇人臣如此少難得是精忠

華陰廟登萬壽閣

百尺高樓出半天登樓平揖大華巔二陵風雨當窗落
兩漢山河入望全古木森森圍殿閣殘燈爍爍供神仙
癡心擬就希夷卜恰愛靈龜小似錢

韓文公墓

在孟縣紫金山

五百年來說盛唐韓公有墓近祠堂一書險葬潮魚腹
萬古長埋佛骨香道許孔林爲弟子文教李壁得歐陽
求師特向孤墳拜松柏森疎帶草荒

比干墓

三代臣工墓早荒
頗愁皇覽半荒唐
想因孔子題難滅
自是周王澤更長
烈士徇名原不幸
宗親爲國肯佯狂
最憐桀殿龍逢苦
好事無人爲表揚

鄴中懷古

曹家父子爲時生
可惜功名誤一身
未盜金刀殘社稷
先留典午亂君臣
黃龍識好悲談客
銅雀臺荒哭美人
剩有河干墳壘壘
春來依舊草如茵

客館

客館新投未定居
緇塵滋味意何如
屋多傾勢疑無棟

樹有濃陰半是樗人海蠹魚容乞米天山哀鴈斷來書
燈紅月白鄉心切健否雙親尙倚廬

移居陸補梅爆考功寓補梅爲石亭
伯門下士

得謝應鸞入畫堂憐君真是陸家莊圖書四壁資枵腹

濁酒三杯動俠腸虎豹生駒神自王謂補梅
二子龍蛇厄歲

事堪傷謂石亭
伯死事燈前却憶當湖日彈指光陰十歲強

禮闈報罷平谷張親家遣其子來迎因與豹文先

生偕往途中得詩二首

失色看僮僕低顏逐蹇驢避人還出郭謀食又吹竽親
串他鄉得師生其載驅漁洋堪訪古未用哭窮途

潞水糧初集盤山木正榮此行原豁達到處有逢迎且
醉燕郊酒仍調紙寨箏眼前須快意科第是浮名

崇正鐵礮歌

平谷古城今不見城頭鐵礮流人間字鑄大瑞杜勲造
歲紀崇正之十年惟時艱難國步險獻賊在荆闕在陝
得孫傳庭仍就戮有曹文詔動遭貶不信大臣信監軍
日殺無辜上不聞長城已失檀道濟朔方又用魚朝恩
此礮不知曾試否土蝕苔封欲無口遠道移來汗馬牛
洪鑪鑄就血雞狗破陣攻堅礮有功倒戈背主人則庸
有礮無人地摠失有人無礮城難攻君不見錦山頂上

自介集 卷二 三
礪不聲二十萬衆散如螢天佑 聖朝非人力海關迎
入大清兵

靈山觀荷

靈山出靈泉田田種秔稻窪處盡荷花十里香風遠清
光動雲日淨氣拂林杪飛鳥浴沈潭遊魚聚密藻嗟余
寄異地苦被市聲惱得此水晶域俗塵快一掃羲和失
炎威神仙在瓊島羨煞山中人欲訪廣成道微聞石碾
鳴水作建瓴倒故鄉多此聲却憶醒園好

平谷錢歌

平谷市錢一當六土人持籌計之熟微物動費數十千

遠客初來詫異俗京師市錢一直二貨賣先分大小字
卽今市儈慣欺人算繆莫向漁洋肆

壬辰

清明

客裏清明有底愁踏青人勸懶從遊郊原墳墓多新鬼
風雨親朋隔舊州一室尙憐兄弟健九泉難問死生休
旋沽市酒空庭酌起看慈烏欲白頭

禮闈報罷

又作燕臺刼躁人兩年空負上林春功名太早原非福
腹笥難充却是貧失馬常聞塞翁語歸心先渡左綿津

蓬蒿未必窮吾輩且著吟鞭慰老親

涿州感懷

石亭伯父曾爲此州牧

第一衝繁地重經淚不收杜詩空似母黃霸未封侯白
水埋冤血青山隱戍樓惟聞諸父老流涕說風流

薦福寺

卽鴈塔寺

昔人雁塔題名處野火燒殘剩幾碑有客放歸驚熱眼
不堪亂石草離離

煎茶坪

險試煎茶坪有瀑掣雷電就地湧海潮自天瀉銀漢聲
疑萬竈煮色奪千尺練草木滋醍醐恰從頂上灌魚蝦

失符藻亂向石間竄雪乳日外融花鈴風中斷行人渴
暗消鳴鳥深不見

新紅峽

峽形何偪仄亂石撲我顙羲輪避厓陰風帚出篠簜橋
流一澗雪樹密千重網四月客披裘嵐濕負如襴出峽
天忽開紅日當頭敞

馬鞍嶺

馬鞍時上下我馬力易疲嗟哉鞍上人俯仰腰難支舍
鞍憇石欄一憇移一時蹉跎廿四回人馬同時飢棧危
山欲崩樹黑虎暗窺夕陽不相待亭亭下高枝

觀音礪

山窮忽無路危巖亘山觜下有潭不測上有石將圯五
丁斧徒劈鬼工鑿方始行蟠洞裏蛇穿曲穴中蟻一狼
踞其喉萬人不足恃失步若一墮百年莫能起空有度
人經此礪竟難徙

五丁關

巖關狹且長一線漏天影直疑入三峽疲馬當孤艇漾
水激沈雷古棧陷深井絕壁木下垂勢欲擊人頂想當
開闢時五丁亦徒猛馬駭縮四蹄羊腸未敢騁

牛頭山同雨村壁上韻

立馬牛頭上捧日欲以手懸厓一俯視浩浩水西走天
險此最奇不在山勢陡大小劒如林攢鏐分左右以茲
作帶礪肯讓河嶽後頗怪守土人少勝却多負智或塞
下翁愚或北山叟都忘蟻鬪穴但知蠅鑽牖遂令諸葛
公千載名不朽劒門夫如何望古頻搔首

金山驛疊庚寅韻

青天險盡到綿州先爲郾筒上酒樓一二故人同月旦
五千年事摠風流淡烟喬木放翁意碧瓦朱甍杜老愁
來日怕歸蘇季子相逢休問覓封侯

歸家

雞犬亂斜陽遊人釋馬韁親憐見面墨塵洗客衣黃奔
走驚隣里從容話帝鄉一杯剛在手圓月上高堂

秀水河贈婦翁熊坡山丈

日復

先生真樂廣賤子愧羲之客路三年別親情六月時當
門彌稻町近砌有荷池可怪陶元亮偏無五柳詩

醒園

別來花木高三尺浪走風塵又兩年故榻尙懸詩在壁
新秋重醉酒如泉釣魚磯冷生苔髮招鶴亭空迸竹鞭
願與青山長作主不教牛馬損蓀荃

除夕

客中除夕最堪憐今日重溫饋歲筵李合本支三百口
瓜綿華胄五千年燕毛伯叔兼兄弟薦寢敦盤雜豆籩
三廟享還仍晏室席間長憶大夫賢

此禮創始於
石亭伯父

癸巳

元旦

五更香火到祠堂禮罷先人禮十方共道一生難報本
須知今日是初陽池邊草色當門綠嶺上梅花入墓香
酒盡提壺各歸去新年惟有賀春忙

清明

每屆清明祭掃忙敲鉦擊鼓賽豬羊桃分脂粉粧宗婦

柳拂旌旗署小郎一路看山青到塚兩年宦海白思鄉
吾蜀有自想之語禮成忽動傷心淚記得圜墳獄似霜
謂於事無濟也

祖德詩

大人命次周興嗣千文

我李之初佐虞爲理禹稷同功垂龍濟美言惠行祇政
舉刑止本深枝榮根連實累嗣鍾達人篤生老子天道
助仁唐運斯啟尊夏比殷宗周兩漢湯武綏寧文景恬
淡家法曰慈國寶惟善德劭羲皇庭充伊且滅魏剪隨
屬戎誅叛都舊阿房號新貞觀羅張壹目罔疏千面驅
遣閭閻位廣施大願乃平土宇用侈封建維時五王並樹
四方珠弁玉牒象服鳥章居所拱宿如宮列墻日臨九

郡雨沛八荒於益作宅其分邇涼威厭南楚聲被西羌
早微可慮中落宜傷野雞競鳴靈鷲高翔逼欲納芥惡
姑指楹妾紡嫡祀假寐匡床厥後晦隱寔少恃傍仕者
才能入則孝養史簡從聞筆墨難抗白也綿州仙乎志
量縻祿誰給羔酒自曠詩卑晉陳氣凌卿相友杜師謝
忠君愛將綺思星飛嘯情雲上彼蓋云古此感柰何在
明叔世悲戚殊多官階具覆土器凋磨百川下海萬口
縣河談兵有紙畫策無沙轂推韓信飯弔廉頗操石心
轉持金論和內臣矯制朝露興歌禍水竟成賊流終肆
公異丙吉帝荷丁謂衡陽動遙華陰虧弊涓竭鱗躍岱

傾禽易獸駭火林雁驚赤地橫軻通渠困民飄翳是處
忝離長城木委禮義道沈冠裳散毀稼莽秋田穉寒霜
履賞盜更肥藏甲紛起辱身婦女執節夫男別墳載路
晝伏夜潛絲命幸存菜色猶甘盈阜滿谷聚嶽增巖豈
知不辰勿辨賤良束兒次父斬領抽腸輦騾捕爵逐驢
宰羊燭空蘭若骸積芒岡丹霄染垢紫宙鬱光遐哉弱
植杳耳號亾丸塞劒門矢集京闕琴堂賓退車箱守息
草鞠漆園牧眠府壁戶漠桐槐亭邈碑碣音問并浮虛
及形跡力盡忘疲躬孤獨立以手薄顙歸來敢必
聖主苟出康物改絃洪規絜矩珍席銘盤鈞陶造化左

右名賢恭職庶尹敬讚

煌宣仰聆

溫勅俯察元

淵召棠詠好秦鑑照妍涇洛收已崐蒙定焉趙璧再曜
恒松克桓經營迴幹弗月而年俶基

廟猷羣姿

茂對吹律勸農刻鹹聽市輜采交馳軍書靡致縣邑巨
富烝黎賴利尺寸貢誠尋常效治莊樂遊魚密耽短犢
歲登奉觴冬餘受讀黃精使膳素杞祭熟慶得馨筵豫
藉冥福欣發翠畝濯足投纓秉杞執穡食重勞輕飽恐
近飢糠亦非糧垣育孟筍塲稅孔薑帶溪背岫薪葉食
英生磻引釣據梧調笙體靜禪悅性寂機澄意閒杯約
辭寡囊承佳事謙讓嘉會歡騰綠陞東臯旋資笑答念

諸似續貽誚任俠當暑飫果晚池浴髮振頓扶顛最稱
慎攝卽殆去安莫外矜伐舍兄令伯二妙始盛等阮幾
嵇超逸特俊業工鉅麗習圖雅正途直駒驥璣圓景映
曲奏御瑟組合銀紈要盟故霸射的孰堅廊燁朗魄帷
寫藍牋駕鳳寥陟眺玩徊環拜瞻 殿陛催唱樓端績
學招祐匪貴踐歷布衣表率陪隸扇熱默寓烹解貌適
神惻稽巧移愚勉求往極設鼓勒箴罪疑奄釋每讌黜
糟洞懷悚結甚遼且又過寵惶接摩索儀暉見皆容說
顧茲庸陋獲步弟昆優徘徊與誠典訓遙遵傳嚴母淑絳
帳青巾夙夕攸懼省清侍親修潔羽毛睦俗敦倫永譽

遠耻畏取譏頻既嘗想慕謹條煩因語詳務切字審傳
真

九月十有三日得長女時蟾兒三歲口號一律

一索得男再索女愧爲人父又三年聞啼乍喜聲如鳳
索笑還憐瘦似蟬敢望書香承祖德早羸湯餅到賓筵
千金戲博鄉隣醉俗賀得女曰得千金莫謂無功不下咽

冬至祭祖

先王報本傳家禮此夕宗支聚廟堂祭罷五更風不冷
時添一線日初長灰飛紙蝶山山白蠟綻梅花樹樹黃
爲道常年皆演劇就中羸得小兒狂

州主聘主講涪江書院詩以示意

壯年敢好爲人師不道關書下有司
薄頗慚名易盜家貧翻愧命難辭
涪江水暖魚龍集富樂山高鶩雀知
尙愛綿州州磊落羣賢待我早春時

甲午

涪江書院示諸生

一路尋春上左綿春江綠到講堂
前諸生自昔聞韓說蛾子誰教慕舜
羶近砌有花還待雨遠山無樹不攢
烟斷輪我亦慚輪扁好共磋磨莫論
年

與及門論制藝

文章原小技制藝安足奇不謂功名士念釋偏在茲權
輿有宋代濫觴前明時王唐歸胡輩日月江河之間何
善鳴爾其道未易爲六經固根柢諸子仍支離於騷潔
其韻於史深其資理從一貫悟情向五常移求已勝求
人師意勿師辭松柏欲成棟要先翦繁枝川瀆欲至海
要先決長陂鑿精糠必簸揀金沙務披濁源冀清流止
沸而加炊秋木多死色春花富英姿風雲變態極氣盛
無不宜顧余質庸魯十年下董帷緒論竊前賢堂奧未
全窺禮闈再戰北未敢怨有司願言其切磋古人不余
欺水到渠自成逝者本如斯勗哉各努力漫云莫吾知

與及門論試帖

論詩到試帖於道復何有徐庾唱其先溫李勁其後才
高沈宋名筆大燕許手要皆錦爲心爭誇鳳在口上農
植嘉禾務先去稂莠青天無纖雲然後顯星斗體裁本
拘忌選擇能精否頗慚一字師謬享千金帚廟堂瑚璉
器雖小勝珉玖貧家布帛衣雖好遜組綬文章有冠冕
松柏謝部壘勗哉寶榮名立言貴不朽

觀打魚

城角灘深十丈餘年年三月打官魚巨舟小筏排成陣
赤鯉青魴載滿車剩有常才分網戶也將數尾當園蔬

怪來不敢歌長句工部題詩至德初

觀漲

甲午六月月三日涪江夜漲銀河溢連宵密雲實無雨
深山雨大人不識四更月黑風聲高男奔女竄當街號
但聞沙石走虛壁不知性命何方逃朝來水勢徙北關
城倒屋圻人無煙已見禾苗埋濁浪更憐家室沒黃泉
飯甑尸棺雜然至家豕野羊盡漂棄拍天一嶺橫雲飛
排空萬木游龍戲觀者戰慄愁岸崩移時退步三丈零
狂瀾濺面衣全濕沈雷震耳心尤驚忽訝有人投水急
須臾起向中洲立獨撈浮木繫磐石梁棟大才俯如拾

旁人爭羨我懷愴輕命重財安足尙淘金萬口最堪傷
昨夜夢中魚腹葬

重九富樂山登高和王孟二生韻

登高今歲得英才幾度題詩肯放杯磊落樓臺隨地有
蕭疎風雨過江來孟嘉帽落人偏羨王勃文高序早推
盡醉莫嫌歸去晚此樽原爲菊花開
酣來妙句若天成和罷王生和孟生
爲秋遲仍未禿
水因魚樂肯長清東臨棧道先愁馬西望松川欲解兵
屈指仲冬將北上來年此日最關情

別南村

歸來兩載仍如客解館纔歸又北征題柱擬承司馬志
別親愁聽暮鴻聲某山某水抽身出爲螻爲蛇任運行
不到十年休問信這回端不負平生

及門追餞於綿州渡口口占留別

諸君愛我餞江邊立馬遲迴懶上船酒過三巡堅後約
朋來一載是前緣雲龍相逐非無願雞黍要盟恐未然
語罷停杯揮淚別中流遙揖祖生鞭

乙未

北征十四首

連朝得得策疲驂初慣長征可柰何每夜未眠腰欲折

侵晨強起夢還多
鑾聲乍歇危崖出
燈影遙沉斷澗過
愁水愁山行不得
杜鵑聲裏費吟哦

最是晨征坐欲牢
巖深路黑石梯高
風吹瘦骨強於箭
霜割寒肌利似刀
老樹叢低疑鬼立
妖狐性警望燈逃
幾回顧蹕渾忘痛
直待天明血染袍

更是宵行斷客魂
天寒燭燼道無村
巖蹲似虎愁驚馬
石瘦如牛欲僨豚
性命直疑鞍上寄
手鞭時向口中溫
盼來旅店歸家似
定遠生還入玉門

朝朝暮暮亂雲堆
俯仰高低日幾回
身似輕帆吹浪出
騎如孤鳥破烟來
猿聲天上愁三峽
佛度人間憶五臺

無計剷平青嶂路劒門城郭爲誰開

纔過幾日覺身便上下飛騰勝木鷲遇險漸能先馬驟
得閒時復效牛眠山川自古無平理筋骨從今有壯年
心已忘勞途不惡但逢勝地便流連

幾輩名高太白顛棧南棧北任躋攀嘉陵江出青峯閣
辟穀人歸紫陌山聖德千年留鳳穴武功隨地阨雄關
如何天險翻難恃蝸角憐他似觸蠻

聽盡鶉聲聽碧雞岐山東去路頻低帝王州近雄風在
百二關寒落日迷家食渭川千畝竹誰封畱谷一丸泥
時平更不譏行客夾道青楊送馬蹄

又過長安踏軟紅唐時春色漢時宮詩傳人日誰如父
李父有和賦到甘泉合讓雄華嶽三峯橫郭外黃河一
人日詩

髮劃關中江山自昔稱形勝立馬終南問古風

路長塵軟蹇驢知坐困春慵夢也遲午日烘人疑中酒
橫枝刺帽爲敲詩垂垂稚麥青於鬢簇簇稊楊綠到眉
若遇浩然應識我夕陽驢背霸橋時

四扇潼關枕大河清晨問渡靖狂波地隣唐國奢情少
人近文公譎意多五帝遺風今在否三皇誕說竟如何
厯山已自無尋處悵望中條一浩歌

故友三年別路遙范張雞黍舊曾要高人自住王官谷

烈士長懷豫讓橋此日登堂容拜母前程許我會羹堯
不知妙術通靈否酒綠燈紅話盛朝

路人羊腸險又經太行石色萬年青雄關昨夜開金鎖
覆轍何時出井陘李廣數奇羞對吏淮陰功大伏冤刑
由來宦海風波惡多少癡人夢未醒

險盡滹沱古渡頭貧家麥飯市沙洲燕山易水環畿甸
明月清風遶定州禮佛未妨紆尺地懷人不禁淚雙眸
那堪痛哭阿翁後又哭阿戎築小邱

晨梳喜欲卸征鞍步上蘆溝曉月寒今日河流知永定
古來戰地說桑乾乍驚衣上塵微緇恰愛坊間戶盡丹

信是神京稱富庶肩摩轂擊入長安

考得咸安宮教習口號

已教被放成窮鳥又許追亡附禁鷺聊以解嘲仍乞米
未能免俗且排檠由求豈必甘爲宰李杜何曾博第名
但使文章堪自信不妨暫作老經生

夢梅和王考功鎮之

汝璧

春花已向夢中看夢得梅花夢也仙欲到巫山難縮地
乍經庾嶺似登天清風古驛橫疎影明月前溪淡晚煙
苦道香魂招不得滿身冰雪臥林泉

雪中送友人至天津

大雪荒荒白君胡浪出游亂鴉催曙日匹馬下滄洲野
徑梅花笑空山木葉愁客中還送客長覺此身浮

雪

寒深三晝雪客子正思家有恨都成淚無根慣作花日
光何處避月色夜庭賒戒僕休全掃紅鑪待煮茶

丙申

喜聞金川紅旗捷報

忽起拋書喜欲顛欣聞捷報破蠻烟遙知封禪天

顏霽早識籌邊廟筭全雨洗甲兵清玉壘風搖旌

旆出金川供輸自此舒民力先爲鄉人祝有年

偕明府張雲谷

邦仲

家桂山

天英

食蟹分得味字

維蟹有尖團嗜者各偏貴吁嗟畢卓後何人識此味雲
谷饒過我開筵不惜費堆盤爛紫甲觸手怯鋒蝟投之
辛薑泥佐以麪藥氣咀嚼心兵忙貪饕口涎沸怪雨伏
案聞香風入喉慰桂山忽長嘆頗抱監州畏有螯空恃
武無腸枉沉毅終然甘鼎鑊橫行莫爲諱惟食可忘憂
此嘆應有謂

中秋雲谷借樹軒分韻得趙字

天濶星稀河漢小六街水淨人寂悄踏月市門犬亂吠
借樹軒前頭一掉主翁豪俠今辟疆詩思清新古謝朓

迎門握笑禮節疎移坐中庭燈火杳將酒當茶果當肉
以席爲舟庭爲沼令嚴寸鐵不許持韻險一字猶難了
未畫嫦娥碧霄上况欲神妙秋毫杪惟時明月正當頭
幾枝斜影設空旄偶觸靈機思問天忽得兵符急救趙
自怪今逢大敵勇翻憐昔遇知己少酒酣北海清風發
輪仄西山衆星皎醉呼僊僕扶出門已有寒雞報初曉

和雲谷中秋韻

句不驚人孰肯休明皇今夜月宮遊天街似水浮銀闕
地主如冰倚玉樓舉坐若狂非爲酒一年難得是中秋
霜寒燭燼吟聲細唱到晨雞客尙留

送桂山回蜀和雨村韻二首

一樽菊酒爲誰開
念子新從劒外來
空笑揚雄懷筆塹
不堪張翰憶鱸腮
浮游宦海非無命
成就名山固有才
如此秋風難作別
令人心冷到韓灰

此去舟仍入楚關
猿聲三峽葛重攀
之江月冷枯魚泣
錦里春寒倦鳥還
我失經師愁問字
人誇文霸畧窺斑
相思應上迴瀾塔
莫忘書傳獨鹿山

偕家藝圃給諫

漱芳

孟鷺洲侍御

邵

法源寺觀菊

晚歸和雨村韻

名花美酒不消愁
那更長爲汗漫游
偶過僧房非佞佛

暫來菊徑又驚秋
林鴉有約月生海
鐵馬無聲鐘出樓
歸路燈寒霜滑滑
羊車轆轤穩於舟